

福建通志

第玖拾貳冊
高士傳

K295.7
1

福建高士傳卷一

唐

黃子野字仲某侯官人父周行賈于杭州子野從年方十三適王伾微時覆舟於羅刹江子野行見之呼漁者撈救許酬百金歸取其父舍中裝予之既長折節讀書治左氏春秋有聞於時客或勸之仕而子野性恬淡自悔見知急變名姓焚臺素耕於方山無何伾官散騎常侍使人召之則亡去令福州觀察使物色於陽岐江上有男子披簑卧雪中扣舷而歌使者意其子野遙呼曰仲某無恙乎子野唯唯遂達伾之命隨子野至深山中家徒壁立几上獨周易一卷子野佯喜悅與約旦日天霽會於傳舍及期不至使者馳至其家則書幣封識如故人不不知所往矣

稗史彙編

陳粲一作饒字德宣福唐人歷水部郎中早厭榮寵歸彌勒小隱巖讀書其中

道光舊志

五代

陳陶字嵩伯劍浦人少時遊學長安天文曆數無不精究兼釋老學自號三教布衣常以台鉉之器自負南唐昇元中至南昌將詣建康見唐主聞宋齊邱秉政凡所進擢率浮靡儉佞自料決不能合乃築室西山日以詩酒修養爲事唐主雖聞其詩名而未及召之保大末有星孛於參芒指東南陶歎曰國其幾亡乎既而果失淮甸唐主遷都至落星灣將訪以天象恐陶不盡言以其素嗜鮓因僞使人賣鮓至門陶果出啗鮓喜甚賣者曰官舟抵落星矣處士知之乎陶笑曰落星不還唐主聞之不懌至南都殿前得殘獸一足無有知其故者遣使問陶陶曰是夜乃貪狼星直日故爾唐主歎曰眞鴻儒也將召見會晏駕不還之說果驗陶後以服食鍊氣爲事所遁西山產靈藥數十種陶與妻日斲而餌之二子小字相梨或問其優劣答曰味雖不同皆可於口有詩云礪溪老叟無人問閒列相梨教六韜指一子也久之變姓名徙去不知所終開寶中南昌市嘗見一叟了髻被褐與老媪貨藥於市獲錢則沽酒市鮓對飲既醉行舞而歌曰監採禾

籃採禾塵世紛紛事更多爭如賣藥沽美酒歸去青崖拍手歌或疑爲陶之夫婦云初嚴宇牧豫章以其操行高潔牢欲致之遣小妓蓮花往侍陶殊不顧嘗遊廣州得柑橙歸種即成果令山童嚮之沒後二種皆不實著有詩集及癖書十卷張爲作王客圖摘其詩句入清奇僻苦王孟郊上人室中鈞磯立談海錄碎事北夢瑣言馬令南唐書陸游南唐書閩書

案馬令南唐書云世居嶺表陸游南唐書云嶺南人據鈞磯立談海錄碎事唐餘紀傳皆作劍浦人又五代詩話云江南野錄稱陶得道不死開寶閒猶無恙然唐末曹松方干之徒皆有哭陶詩陶見於唐末而集中乃有贈高閑歌若爾亦自當年百餘歲唐詩人劉商亦傳爲仙去皆不可知也

王仁績福唐人少有志操王審知聞其賢辟授大理評事仁績恥事強藩固辭隱居龍山終其身同時有盧皓林甲者避審知而釣於福唐愛小練山山水誅茅隱焉十國春秋道光舊志

陳貺閩縣人性淡漠孤貧力學積書數千卷隱廬山幾四十年衣食之絕不以動心有季父爲沙門時時賴其資給貺力學苦吟有詩數百首骨格強硬出於常態每得句未成章已播遠近學者多師事焉南唐王李景聞其名以幣徵之貺布裘鹿鞞進止閒肆獻景陽宮懷古詩景稱善欲授以官固辭不受乃賜粟帛遣還卒年七十餘

馬令南唐書陸游南唐書江南

野史榕海詩話

沆貺叔南唐時與貺隱紫霄峰下力田自食能詩沆立性僻野不接俗士黃損熊皎虛中師事之

詩話總龜江西通志

吳翁建州人以卜隱於五夫里先是有張陳二將者以事奔南唐天德時從唐師攻建州屯軍於其地召翁占之翁曰吉未幾天德帝降二將班師道復經五夫里召翁與語因名其山曰居賢山謂翁曰吾欲棄人閒事與公爲林泉交可乎翁乃爲二將卜居於山旁學長生久視之道後皆百餘歲而卒今其地猶稱曰將軍巖

十國春秋

廉若建寧人與妻楊氏隱居於縣東楚上堡當亂離之後教授鄉黨以行誼稱

閩書

詹琲泉州人父敦仁傳在名宦琲勸陳洪進納士洪進薦之朝國辭不就歸隱鳳山號鳳山山人

十國春秋

福建高士傳卷二

宋

柳崇字子高崇安人以儒學著名五季末終身御布衣稱處士王延政據建州聞其名召補沙縣丞力謝不仕後諸子仕宋法當推恩崇戒之曰不可奏請奪吾志子宣宜寘宏寔密察俱仕 八閩通志

余起順昌人不求聞達當咸平景德之際隱居於祥雲峰嘗扁舟往來垂釣潭中里人高之名其潭曰釣潭 道光舊志

林緒莆田人五代末杜門避世窮索古典常慕陶潛嚴光之爲人大中祥符七年詔舉草澤州郡以緒應特授將仕郎本軍教授不出 八閩通志

陳則之侯官人有文行養高不仕惟以著書爲業鄉人薰德者莫不厲操改行弟象天禧中登進士第 八閩通志

童參甌寧人性淳樸躬耕自樂仁宗元年參年百有二歲賜勅慰勞授承務郎逾年卒 甌寧縣志

詹先野字景舒崇安人經史諸子歷覽無遺天聖四年領鄉薦繼應賢良科後竟不仕隱居廩江之濱每嘯詠武夷山水閒人謂其有仙風道骨焉
八閩通志

湛俞字仲謨閩縣人寶元元年進士累官屯田郎中爲本路轉運判官年五十休致居館前鄉人名其坊爲旌隱尋復遷於城南宿猿洞三召不起
劉康夫爲撰山居記 八閩通志

黃非熊永福人慶曆閒讀書三島村因得方廣巖之勝捫蘿關洞作十詠傳於世後養高不出自號南溪處士 道光舊志

崔唐臣晉江人與蘇頌呂夏卿同學相好二人先登第唐臣遂罷舉久不相聞嘉祐中二人在館下一日忽見艤舟汴岸坐于船窓者唐臣也亟就見之邀與歸不可問其別後事曰初倒篋中有錢百千以其半買此舟往來江湖閒意所欲往則從之初不爲定止以其半居貨閒取其贏以自給粗足卽已不求有餘差愈于應舉覓官也二公相顧太息而去翌日自局

中還唐臣有留刺乃攜酒具再往謁之則舟已不知所在矣歸視其刺之末有細字小詩一絕云集賢仙客問生涯買得漁舟度歲華案有黃庭尊有酒少風波處便爲家訖不復見

避暑錄話

徐復字希顏一字復之莆田人嘗舉進士不第退而學易衍卦氣京房易世久無通其術者復嘗遇隱士得之雜以六壬遁甲諸術數自筮終身無祿遂亡進取意遊學淮浙間數年樂其所自得故窮閭陋屋敝衣糲食或至於不能自給未嘗動心遇人無少長貴賤皆盡恭其言前世因革興壞是非之理少能及者然其家未嘗蓄書蓋強記也他日聽其鄉人林鴻範說詩且言詩之所以用於樂者忽若有得因以聲器求之遂悟大樂於七音十二律清濁次序及鍾磬侈弇匏竹高下制度皆洞達仁宗方留意於樂詔天下求知樂者大臣薦胡瑗瑗作鍾磬大變古法復笑曰聖人寓器以聲今不先求其聲而更其器其可用乎後瑗制作皆不效康定中李元昊叛詔求文武材可用者參知政事宋綬天章閣侍讀林瑀皆薦復詔賜

裝錢州郡迫趣上道既至仁宗見復於崇政殿訪以世務復所以爲上言者世莫得聞也仁宗因命講易乾坤既濟未濟又問今歲直何卦西兵欲出如何復對歲直小過而太乙守中宮兵宜內不宜外剛失位而不中其在彊君德乎帝又問明年主何卦復曰乾卦用事又問前年京師黑風何所應復曰其兆在內豫王喪其應也明日命爲大理評事固以疾辭又獻所爲邊防策太乙主客立成曆洪範論俱留中必欲官之固辭迺官其子晞宋史作發留復登聞鼓院與林瑀同修周易會元紀歲餘固求東歸仁宗高其行禮以束帛賜號冲晦處士復久遊吳因寓杭州西湖每州牧至必先加禮然復未嘗肯至公門范仲淹知杭州數就復訪問西兵事起復預言罷兵歲月又斗牛間嘗有星變復言吳當大疫後皆如其言復平居以周易太玄授學者人或勸著書復曰古聖賢書已具顧學者不能求吾復何爲激名哉晚取其所爲文章盡焚之後存十餘篇皆出於門人故舊之家復卒年七十餘旣病故人王稷居睦州欲往省之復報曰來以五六月之

交尙及見子稷未及往至期果死贈尙書虞部員外郎復死十餘年而沈
遵知杭州榜其居曰高士坊錢塘兩處士林逋居孤山復居萬松嶺一時
並峙云 元豐類稿北窓炙輿避暑錄話宋史

案宋史作建州人誤

蘇繹字謀甫同安人頌之叔年十七舉進士以病臂不克赴試遂棄詞業
專精文史陰陽星曆占筮術數百家之言靡不精造善推考人生年月日
時以五行星數叅驗休咎合若符要又學道家養生吐納禪宗止觀傳心
之說時兄紳在翰林乾元誕節泊南郊禮成皆得推恩子弟數欲薦仕繹
辭以病謂勿妨他子弟之宜薦者紳善之遂任幼弟縉及繹子觀皆爲京
司官自是繹不復有榮進意結宇近郭闢爲賓館躬殖財產才取贍足日
與鄉人爲飲食宴樂之好凡賓客過從無問高下色目一接之以禮至於
館餼祖餞亦不以菲廢時或談議釋道考運命閱骨相有咨訪者皆爲之
評析品目悉如所言諸貴要使車過郡者必造其門年少時尤好黃白點

化之術一日有道人過之云我有祕訣欲求人而授之得其人則我將逝矣因命取水銀一杯坐閒銷爲白金繹驚異未敢遽問姑留於客館一夕道人奄化遂貨其所銷白金爲殮葬資適取足焉因歎曰吾平生接方士多矣今遇異人而不得受其術命也奚復勞心爲耶遂索故所蓄方藥盡焚棄之終其身不復語黃冶事熙寧十年某月日嬰小疾遽逝年七十有

二 蘇魏公文集

梁公

一作君

護字湯夫南安人李邕之婿也晦跡韜光不樂仕進隱邑之靈

秀山風節甚高詩翰清美人多傳之

八閩通志

陳易字體常興化人好學工詩熙寧初遊京師會太學秋試諸生競求舉易以爲非已所學棄不就王安石邀至相府一見不辭而去遊廬山歸乃築室於縣之蔡溪巖與同鄉學佛人曰需者相親善人或就見亦無忤也不葷不娶日惟一飯旣而需就南湖草庵易自留寄煩山中香泉寺野服角巾或經旬不食如是者三十年不變嘗曰性命之理儒與釋一也顧爲

教不同耳儒所不言者釋氏詳之然可言者非其至也崇寧初詔舉遺逸之士蔡師言首以八行薦之郡守郭重致禮易易謝牋有曰昔在儒門雖粗修於八行晚歸祖道惟務了於一心心既已忘行復何有重遂不復強易嘗傳易學於張弼自謂有得於五行醫卜地理之術善筆札作字精謹平生接朋友或終日不交一談或爲語莊老釋氏大意則亹亹不倦蓋隨其興意所至宣和末年卒

墨客揮犀東越文苑道光舊志

林知字子默晉江人隱居篤學有志尙築室吳山之巔人鮮見之熙寧閒嘗詣闕上書論時政久不報在京時惠安簿林迥訪其書室題壁閒曰先生平昔命何非萬卷詩書一布衣回首長安成底事吳山蒼翠幾時歸遂歸隱不出

八閩通志道光舊志

順昌山中人不知其姓名亦不知何許人也靖康末避亂順昌山中者深入得茅屋屋中主人風裁甚整卽之語士君子也主人初見人頗疑訝徐問曰諸君何事挈妻子至是告以故主人曰亂何自起也眾爲言主人咨

嗟久之曰吾父仁宗朝人也嘉祐時居此中因不復出吾所聞有熙寧不知於今幾年乃至於此矣

續高士傳

劉元振字君式崇安人少沈靜有器識季父中散大夫勳當蔭子將屬元振辭與其弟貺弱冠遊太學呂大臨游酢皆與友善元豐中士子方尙文華元振獨沈涵載籍深造義理以是不合於有司歸告其親曰兒爲志養不爲祿養矣遂不復舉進士子勉之自有傳

道光舊志

黃公懋德化人三舍法行公懋得升名於州以不喜王氏三經字說隱居教授以終其身

道光舊志

黃登字君涉少遊上庠與陳覺民有研席之好及覺民守泉未嘗干以私卒覺民以交誅之謂其窮經恥受一命學道遂造大方視蔬茹如享大牢在燕處若奉五戒張讀亦以隱君子目之

八閩通志

劉渙字孟潛侯官人隱居北溪以歌詩自娛元祐中鄉人千餘交薦其才於郡守許懋乞以應逸民之詔懋聞于

八閩通志

邵清字彥明古田人元祐間太學諸生有十彥之號清預焉嘗從張橫渠學易崇觀閒還家遂不復出築室先塋之側聚書千卷角巾鶴氅徜徉其閒有故人爲河南尹歸使人召之清曰是子欲以富貴驕我耶卒不往鄉人因其嘗膺八行舉呼爲八行先生子整

八閩通志

整字宋舉自號蒙谷遺老教授生徒常百餘人邑人蘇大章從之遊終其身整少嘗從合沙張少樸學易傳六十四卦圖說及春秋元經其纂集圖序甫訖而卒

八閩通志

陳俯龍巖人元祐閒與劉棠同里俱工詞賦志不混塵俗時人稱曰劉棠陳俯漳南賦虎劉旣登科陳遂隱跡溪南莫知所終

道光舊志

宣明字南仲長汀人貢入辟雍旋歸築室城南五里巖郡守謝炯時訪造

焉題其巖曰宣巖

八閩通志

袁謙字彥先崇安人建中靖國閒耕隱縣之黃洋原結菴名玉泉賦詩有

時人不識田園樂只羨相如駟馬車之句

八閩通志

鄧春卿字榮伯長汀人崇寧間有詔舉遺逸汀州太守陳粹曰亡如榮伯矣其爲人方聞有令圖可以事天子春卿聞之乃告粹曰臣有內病不任偶旅不可以見帝有如徵臣臣逃之海上矣於是粹乃已久之復有詔舉善八行者太守章清文遂以春卿聞郡中士終無以易榮伯也春卿固以疾辭終不就春卿居於南山二太守數從車騎親數存之語未嘗不移曰春卿有詩文三卷年九十六卒

八閩通志東越文苑

謝安時字尙可政和人博通經傳涉筆成文崇寧大觀間以兩優貢入辟雍謁告歸復預鄉薦靖康之變攜家隱西坑別墅庭植三桂號桂堂居士後以累舉得官卒不拜終於家鄉人挽之以詩有不肯上書遊北闕只緣留意在東山之句

八閩通志

林搏字圖冲

一作

南福清人舉八行人太學政和五年中特科授楚州參軍

不赴退隱於靈石九疊峰之下鄉人因目爲九峰公搏好鼓琴嘗欲學琴